

敬鄉筆述卷六

天津徐士鑾沅青輯

周節烈龍氏

續邑志列女傳龍氏河南汝寧府知府圖耀女

高凌雯案圖耀

當作躍續縣志誤

庠生周鼎妻鼎疾氏刲股和藥不瘳及卒氏

自縊於柩側家人救甦氏哀泣不已淚盡繼以血月餘絕粒而亡乾隆二十六年學使金公德瑛給匾旌之二長自邠邑庠生次自邠官高州府通判余見耆飲昇平冊於續志攷查南橋別駕得見龍氏之傳知別駕卽

敬鄉筆述卷六

一

長春書屋

大迂先生胞弟乃歎伯仲兩邑賢出自龍氏賢母也又於舊邑志見例貢載有龍圖躍名下注河南汝寧府知府居官有聲因思舊志特注居官有聲四字必確知其爲太守之賢者若然龍氏實爲賢太守之女於以見有賢父乃有此賢女也節烈周母於二子成立日得蒙學使給匾褒旌又以子貴顯膺封典而邑志有傳其事其人允足千古矣余見周節烈龍氏父賢而二子皆賢爰掇述梗概以表章之文珊司馬津門徵獻詩成於續邑志之前未見龍氏之傳若有所見自必入詠也

樊節烈王氏

袁穀廉大令邃懷堂詩集有詠天津樊烈婦五古一首
詩云世無劉中壘誰記節烈婦烈婦王氏女樊門奉箕
帚夫壻名景恆德器孝兼友晨織蘇蕙機夕春孟光白
賢聲遍閭黨贊歎及姑舅相期宜子孫伉儷占无咎不
圖兩髦髡龍蛇厄陽九烈婦泣顙天請代減妾壽妾身
無重輕郎身有父母玉樓符已召那得遷延久化鶴與
驂鸞誓必隨其後勺漿不下喉金環已入口腸中轉車
輪有如飲鳩酒六親盡驚訊惜此姬姜偶謂婦盛年華

敬鄉筆述卷六

二

長春書屋

青燈可獨守胡爲自戕生刀斷連絲藕新婦再拜言多
謝意誠厚三良昔從死篇什聖人取女子殉所天大義
豈可負黃泉骨早埋碧血心堪剖是時天地黑悲風撼
戶牖三日屍猶香精魂貫星斗津門十萬家望空欲稽
首煌煌綽楔旌芳名勒瓊玖作歌告輶軒此歌置座右
滄桑或變遷烈婦永不朽案節烈王氏爲前湖北蘄水
縣丞樊文卿貳尹彬冢男月槎上舍景恆之婦也續邑
志有傳文珊司馬津門徵獻詩所載樊烈婦傳暨徵詩
啟並有數家輓詩今讀袁大令五古一章可謂情真語

摯敘事尤明爽如話表章節烈允傳不朽矣

王孝烈湯氏

袁穀廉大令哀忠集載前浙江樂清協副將雨生湯公名貽汾江蘇武進人寓居金陵辦防堵事宜咸豐三年二月初十日城破殉節次女嫁王氏歸省在家亦投塘死有七絕二首輓之其次云曾讀離騷拜左徒雙清池比莫愁湖投塘愛女同攜去留得冰心映玉壺又梁敬叔觀察恭辰勸戒七錄載烈婦湯氏婦名嘉名爲雨生都督女工詩畫適某貳尹方北上依父居金陵癸丑春

敬鄉筆述卷六

三

長春書屋

賊逼城父促家人走婦獨不忍去旣而父躍池死婦從其遺命藁瘞之乃亦赴水死案哀忠集所云嫁王氏勸

戒錄所云適某貳尹卽吾邑前廣東雷州府

賈廷琳案府上當有

知字王鶴舟太守第三子瀛之婦也嗣閱蔣苙生墨林今

話續編湯樂民名祿名雨生師第四子克承家學善畫白描銀鈎鐵畫雅近李龍眠妹嘉名字碧春王鶴舟太守子婦工白描人物據是以觀知孝烈兼工詩畫也攷續邑志王孝烈湯氏已經載入有小傳似未甚詳爰彙錄所見以表章之傳中作陽湖人與哀忠集作武進人

異檢視湯貞愍公琴隱園詩集固作武進人也哀忠集
稱公次女文珊司馬緘齋雜識作雨生都督第四女互
異俟攷

賈廷琳案王孝烈湯嘉名女士有題唐孝女
惠觀梅花小像詩四首惠觀爲唐確慎公鑑
之女母病曾割左腕肉以進母愈孝女尋逝
詩見割臂贈言今附錄於此以備津邑人士
采擇焉紅閨生小慣嬌癡獨行偏傳絕妙辭
千古綱常餘我輩世間原自有男兒射雀爭
看百兩迎嫁衣黃竹忽塵生縱教消盡人間
福何似千秋不朽名早拚兒命代添籌忍背
神前自禱求容易芳魂香國住一誠抵得幾
生修雨花臺畔女郎墳綽楔戕戕遠近聞合
種梅花三萬樹縞
衣仙佩共芳芬

敬鄉筆述卷六

四

長春書屋

鄭節烈劉氏

附記設立採訪局

津門古文所見錄附載鄭烈婦傳烈婦田家嘴劉紹棠
女幼許字大沽鄭起之子廣義廣義八歲股生疽十年
不愈而益劇鄭起知其子年不能永也致意婦家請絕
婚父母皆允矣以語婦婦曰許嫁而死猶當守之况未
死乎病廢命也宜令其速娶女將侍疾固勸之不可卒
歸鄭廣義病不能人性尤乖戾屢撻婦婦燂湯敷藥抑
搔扶持十年如一日無怨無倦無悔又善承舅姑歡其
舅亦嘗對人道婦賢無何廣義死其舅素操舟以輪舶

暢行人不逮出且將別立嗣風婦使改適婦泣不答衣
縞飯糗若將終身服既闋姑使歸寧陰囑父母爲勸嫁
父母躓之果勸以乏嗣無可守小家不必拘婦不應勸
之亟乃曰女歸時豈不知壻病廢且瀕死者今改志何
若初不歸女生爲鄭家婦死爲鄭家鬼請從此逝女不
復來矣遂返其舅竟爲之議婚迎有期始告之曰我夫
婦老且貧汝又無嗣我二人百歲後汝將焉託服未闋
嘉汝志不汝奪也今已爲汝擇安樂所元夕後來迎汝
汝其勿再執拗以自誤婦不言亦無愠意舅姑喜甚不

敬鄉筆述卷六

五

長春書屋

疑其有他元夕屆婦沐浴更衣履談笑如常晚俟舅姑
寢仰藥卒姑微聞聲起視之已僵矣面如生衣服無少
汙年三十三歲光緒十一年正月十六日也案鄭烈婦
傳後有邑人華樂農景安識語此傳爲故城柴孝廉青
藜譔氏卒同里士民臚列事實籲求吳軍門殿元轉稟
李爵相奏請旌表奉旨允准余見樂農所記知係奏案
亟詢採訪局當日果未來報當錄鄭烈婦簡明事實屬
局記册商諸紳董爲鄭節烈劉氏設位節孝祠爰就傳
中掇述其要以表章之

謹案郡城採訪局光緒元年乙亥邑紳前浙江
布政使沈兆澐稟請彙題請旌經督部堂李奏
明奉旨允准初設局時一年稟請一次近改二
年一次逕稟府署轉詳每次人數總在二百名
外局在會文書院局事卽由書院紳董管理帳

房司事兼理冊籍稿案

丁酉冬
月記

楊孝烈張氏 附徵詩文啟

樂亭史香厓先生夢蘭爾爾書屋詩草有天津楊孝烈
張氏輓辭一首詩云郎無子女妾有尊章郎今已矣尊

敬鄉筆述卷六

六

長春書屋

章在堂尊章在堂年已邁子死二老將奚賴欲殉不殉
心徬徨恐節無虧孝或礙阿翁痛子中道徂阿姑咀痛
稱孀姑黃鵠歌中鵠並寡青鸞鏡裏鸞同孤蟲聲咽寒
砌燈影暗空幙與姑同室形影俱姑心無恫妾心娛甘
旨供岡缺杖履親爲扶病侍湯藥歿殯葬十年拮据手
口瘠昔未殉夫爲事姑今姑又逝復奚圖甘心絕粒辦
一死殉夫殉姑無差殊况以婦職代子職黃泉相聚應
歡呼南國有貞姬東海有孝婦誰則節全孝復全惟有
斯人兩無負案楊孝烈張氏爲吾香吟師嫡堂姪婦師

命作小啟以徵題詠一時徵詩甚夥尙未彙梓今閱爾爾書屋詩草載有輓楊孝烈詩因亟錄出並將拙作小啟附錄於後俟異日再修邑志者采擇爲之立傳楊孝烈已得旌矣

楊孝烈張安人徵詩文啟

蓋惟女貞木秀閱風雪而始華旌節花榮麗日星而並耀以故顯桓嫠之行義閭表芳徽崇巴婦之懷清臺彰淑德褒揚懿美闡發幽微允堪永式儀型潛維風化矣况夫操持自矢習染不移死效甘心全節且

敬鄉筆述卷六

七

長春書屋

兼全孝誓酬結髮殉姑仍卽殉夫慷慨捐軀從容畢命更可哀也良足述焉則有待旌節孝楊母張安人者太學生楊葆廉之妻庠生張麗生之女也幼奉母儀長通女訓柔嘉稟度芬蕙翔聲慧性三生悟拈花之夙業靈心四映媿詠絮之清才問名則僉美淑姬擇配則皆稱嘉耦同爲望族爰結良姻迨梅訊之先通正桃夭之已屆珠聯璧合載賡之子于歸玉潤金和競道彼姝靜好調羹洗手舉案齊眉怡柔以悅尊嫜謙抑以和娣姒雞鳴警旦不牽兒女私情鵬展摩

霄且勛丈未壯志雖芙蕖連理吉夢無徵而萱草宜
男韶齡可恃唱隨共樂伉儷無乖相將菽水歡承共
堂前而戲綵豈意藁礎數盡歸地下以脩文易簀悲
銜撫棺慟絕三辰莫告一死靡他身視毛輕防迭勞
夫婢媪淚隨聲下勸倍亟於翁姑若決同歸益親懷
之莫慰暫教獨活洵婦職之宜完於焉首則簪蒿心
如集蓼晝勤澣濯夜亟縫紉荼苦幾經鞠凶又降翁
遽長辭於塵世郎應先迓於冥途死者相逢生者何
恤姑嗟影隻婦痛形單認梁燕之孤飛聲聞長歎聽

敬鄉筆述卷六

八

長春書屋

砌蛩之碎語意觸同悲而安人力抑哀傷強爲歡笑
膳謀甘旨晨昏必請加餐衣問燠寒昕夕不違安寢
形容蕉賴瞬息十年筋力薪勞眎如一日無何姑嬰
危疾醫鮮良方護持則逐日愁添祈禱則籲天願代
喘延臘尾盼轉年頭非關續命丹無究係限年素定
安人姑辛卯 撫衣衾而視斂禮盡慎終焚楮帛以感
元日逝世 懷約難忘舊遂乃含哀絕粒視死如飴心比石堅腸
同雪淨踐盟言於白水尋夫壻於黃泉本來瘦骨支
離不殊病鶴僅賸柔絲斷續待盡僵蠶當茲菅履持

喪仍是麻衣赴義安人正月廿五日完節吁其烈矣而豈徒哉

兩姓增輝一鄉播美如斯賢媛聿徵世德於文貞得此完人具見家風之清白今者冰霜操重雨露恩稠

詩采柏舟恰值輶軒使到二月上旬督學使者按試津郡學校擬公呈請旌

詔頒楓陛行瞻綽楔榮邀有志竟成難能可貴名自垂於萬古祀當報以千秋然後歎草挺孤芳當疾風而自勁花留老圃至晚節而彌香也鑾戚忝葭莩生同桑梓雖曰見聞較確其如列敘無文敢祈藝苑宗工騷壇詞伯矜其苦詣錫以華章不吝揮毫相爭題

敬鄉筆述卷六

九

長春書屋

句文則篇成錦繡詩則字灑珠璣卽看振藻揚葩揭出青燈夙志闡貞表烈傳來黃絹新辭用效引隍勉

攄佩臆

光緒辛卯二月

張貞孝女蘊仙附同鄉官公稟稿江西撫奏稿

蘊仙詩草一册吾邑貞孝女張蘊仙所著也蘊仙爲玉貞之號蘊仙父號愛樵名棠宦江右有年愛樵女二長卽玉貞次淑貞子二長文山大令蔭以經歷需次湖南由軍功擢知縣次渭川參軍夢熊以經歷需次江西皆蘊仙之弟也蘊仙事父母撫兄弟孝友無閒言幼卽矢

志養親守貞不字父母不能奪性絕慧琴碁書畫稍涉
獵卽悟其微尤工於詩長篇短什偶播人間見者莫不
斂手避則蘊仙之才可知矣母先歿毅然任家政井井
有條事老父始終如一曰可謂釵而弁者且爲弁中之
卓卓可傳者其妹淑貞亦工吟詠余從香吟師架上見
蘊仙詩草當卽攜來閱之方悉其詳謹就序中撮其大
要錄存以俟再修邑志采入余無意中見此詩冊殆孝
志貞操有未可以泯滅者詩草有梅州吳秉慈光緒乙
亥年一序是時文山大令已歿蘊仙父愛樵尙存至愛

敬鄉筆述卷六

十

長春書屋

樵爲江右何官序中未詳詢問邑人無知者香吟師亦
久不記此冊從何處得來矣 余錄存貞孝女節略總
以未悉張蘊仙家世爲憾時閱年餘矣一日謄眞所輯
稿本適三姪思珍侍側余因指示張貞孝女事思珍曰
張蘊仙卽遂閒堂張氏族中人也聞已請旌光緒十九
年始歿余聞之悅甚命其往詢越日攜來蘊仙詩草一
冊旌表貞孝錄一冊錄中首列同鄉宦江右者公稟一
稿並列敘張貞孝女事實又江西巡撫潘偉如中丞霽
奏稿俱應錄存至前撰節略不必再易亦可並存俟修

志者裁擇爲之立傳所可異者當余見蘊仙詩草時蘊
仙已歿謂非孝志貞操未可泯滅默默中有啟余者乎
案貞孝女張玉貞歿於光緒十九年三月十三日余既
悉其詳告知採訪局並知照張家於二十二年四月二
十八日約齊會文書院紳董皆具衣冠送張貞孝女牌
位入祠

同鄉官公稟稿 具稟樟樹鎮通判李玉城等爲公
報孝女守貞懇請旌表事竊惟我朝孝治之隆化成
至廣達乎閭巷爰及閨幃凡懿美之克全皆褒揚所

敬鄉筆述卷六

十一

長春書屋

必逮乃有爲女盡孝歷久完貞如宦女張玉貞者幼
讀孝經長嫺內則諸姑稱其和順三黨式其禮儀本
賦性之獨純知事親之爲大人中佼佼已是華年膝
下依依猶然孺慕晨昏在側左右無違當夫寇盜紛
來室家遠徙弟出門而負米妹遣嫁以分襟女則浣
饋必親琴書相伴絜采蘭之養詩補南陔忘樹護之
憂畫摹北苑人或詡其雅尚女實將以孝思迨母氏
年迫桑榆病辭葠朮乃割臂以和藥輒叩頭而禱天
至於瀕危誓以身殉吞金也遇救投繯也復蘇初則

痛不欲生既而幡然變計母去世尚有父存弟悼亡
誰憐姪幼用是歡承白叟貌瘁青娥但思鳩杖常扶
不願鵲巢載詠遂矢十年不字之志以報雙親罔極
之恩迄於堂上考終閨中獨守髮已垂白心原抱丹
金玉葆身松筠挺節斯可謂之孝矣抑可謂之貞矣
戚里引爲美談風人傳其軼事某等籍聯直隸官服
江西屬在梓桑不忍沒其潛德冀邀綸綍俾克播其
芳聲理合開列事實出具印結公懇憲台俯賜察核
詳請旌表以彰貞孝而示褒榮謹稟

敬鄉筆述卷六

十二

長春書屋

一該孝女張玉貞係直隸天津縣人爲乾隆戊子己
丑聯捷進士翰林院編修銜河南學政原任宗人府
主事張虎拜之曾孫女道光辛巳副榜原任江西彭
澤縣知縣張鳳輝之孫女江西候補縣丞署撫州府
經歷張棠之長女隨祖父任生於江西

一該孝女生於道光十四年十二月十三日至光緒
九年計五十歲女生之前夕其父母同夢燈花大如
車輪髻鬢卽聰穎識字及笄博覽經史能詩文性幽
靜不出閨闈事父母順意承志朝夕不懈尤慕嬰兒

子及曹娥之爲人矢志不字恆曰罔極之恩長報親之日短不忍離也有來議婚者父母以大義導之女輒曰願侍父母終身若奪初志不願爲人父母不忍強旣而族戚設法勸之女怫然曰是迫我於死也乃絕粒數日一病幾殆父母憐其志遂不許字

一該孝女值逆匪竄擾江西隨父母避居鄉曲常以刀自隨防暴也迨咸豐三年母沈氏卧病女晝夜侍湯藥衣不解帶母病劇女焚香告天割左臂肉和藥以進母卒不起決意以身殉自縊者再皆遇救乘間

敬鄉筆述卷六

十三

長春書屋

吞金環得良醫以藥出之竟不死

一該孝女父於光緒七年得病女一如侍母不離左右彌月父歿哀毀骨立送殯後刺血寫金剛經爲父母祈冥福至今持誦弗輟

一該孝女詩學唐人著有蘊仙詩草芬芳悱惻泣血詞尤孝思肫摯令人不忍卒讀並善鼓琴繪事藉以娛親且寄師古之志父母亡後遂不作詩亦不輕爲人作畫其用意如此

潘中丞片奏稿 再孝女張玉貞籍隸直隸天津人

係原任江西彭澤縣知縣張鳳輝之孫女前江西候補縣丞署撫州府經歷張棠之長女隨祖父任生於江西該孝女自幼聰慧識字及長涉覽經史能詩文善書畫性情幽靜不出閨闈事父母能順意承志朝夕不懈撫弟妹以成人矢志不嫁避亂鄉曲常操刀懷袖備嘗艱險咸豐三年母病晝夜侍湯藥衣不解帶母病劇焚香告天割臂肉和藥以進母卒不起願以身殉投繯吞金者再皆幸遇救得生光緒七年父病一如侍母時父歿哀毀骨立殯葬盡禮據樟樹鎮

敬鄉筆述卷六

十四

長春書屋

通判李玉城等開具事實冊結呈由藩司邊寶泉具詳請奏前來臣查孝女張玉貞賦性端莊秉資聰穎割臂和藥奇性過人懷刃防身潔清邁等侍奉盡靡依之孝志比金堅平居矢不字之貞操同玉潔洵屬閨門之潛德宜邀曠典之褒揚合無仰懇天恩勅部旌表以闡貞孝而維風化除冊結咨部外謹會同大學士兩江督臣左宗棠江西學政臣陳寶琛附片陳明伏乞聖鑒訓示謹奏案附片於光緒九年六月二十四日會奏七月二十日軍機處奉旨著准其旌表

禮部知道欽此八月初九日遞回原片也

賈廷琳案先師豐城毛實君先生慶蕃撰有
博白陳朱二貞女事略册首刊有天津貞孝
女史張玉貞題詞七律二首廷琳若未知張
貞孝女史之事實今得此編讀之始獲聞其
詳至蘊仙詩草聞今尚有傳本但未知此二
詩已載入否姑附錄於此以免遺失博白雙
貞事絕奇乾坤正氣屬蛾眉玉臺虛納温家
鏡瑤軫剛餘寡女絲慷慨明心文字見淒涼
結髮剪刀知千秋一掬蒼梧淚莫賦尋常薄
命詞舊話朱陳嫁娶圖名門繼跡合成符空
幃獨處心相印大節同操德不孤玉潔冰清
雙美聚天荒地老萬緣枯守貞我亦嬰兒子
又見聯芳
女丈夫

鄭孝烈女菱仙

敬鄉筆述卷六

十五

長春書屋

華聽橋二尹鐸孫自粵東幕遊旋津攜有鄭孝烈女徵
詩文節略爲徵題詠余分得一紙亟照錄存鄭孝女小
字菱仙籍隸天津乃管帶運署綏靖營勇都司銜候補
守備鄭騰霄都戎起龍之次女也光緒七年辛巳生於
粵自幼至性過人就傳三年習詩書知禮義許字同鄉
廣東候補縣丞趙紫封二尹聯綬之胞姪嗣元尙未迎
娶母袁恭人先後舉子女五鞠育艱辛孝女念母氏劬
勞鬢齡卽知經理家政提攜弟妹一如成人迨二十二
年三月初八日袁恭人忽患舊疾兼染時症孝女見母

病勢增劇焚香禱天願以身代刲股和藥以進衣不解帶目不交睫水漿不入於口者五晝夜而袁恭人於三月十二日丑刻竟至不起時則親族環集哭聲鼎沸鎗火黯然孝女涕泣哀號肝腸欲裂俄而頸血亂飛上下噴薄眾共驚駭奔救見孝女鬢髮皆殷襟袖爲赤諦視頸上創痕四處並皆深入奄奄一息不絕如縷蓋孝女自刲以殉母矣一時見者慘不忍覩距袁恭人疾終未逾晷刻年甫十有六也嗚呼何其孝且烈哉其事其人並堪千古某等誼關桑梓目覩情形深恐淹沒弗彰用

敬鄉筆述卷六

十六

長春書屋

敢開陳事實上塵清聽伏望鴻題或賦詩詞或編傳贊俾流芳百世含笑九泉異日疏達彤廷得邀旌表是則采風者之職也謹誌其大略以備采擇焉據聽橋云同鄉宦粵東者擬聯名具稟公懇大憲題請旌表矣在粵在津所徵詩文並擬彙梓以傳一時邑人題詠者卽有數家余亦題七古一首詩云孝女殉母何其烈七首一揮脰噴血於時未肯遲須與此志可知早決絕女聞刲股愈病親醫皆束手猶回春女今刲股母竟死恚恨難自容其身君不見漢曹娥父爲迎神沈洪波哭屍不出

心恚恨身投江水名不磨我道孝女曹娥比

案曹娥年十四孝女

年十

六 純率性眞行諸己孝女氏鄭名菱仙坊表揚芬光

梓里拙作不足觀藉附孝烈女以傳異日重修志乘鄭孝烈女必應立傳列入者也

節婦崔氏李氏事記

牛次原太僕有周芷囊中丞二妾事記附載津門詩鈔
余見此記續志藝文未載特爲錄出崔氏李氏周芷囊
中丞公側室也初中丞因公革職歸里旋奉罰修完縣
城垣家貲已充帑工未及半中丞卽謝世崔李方盛年

敬鄉筆述卷六

十七

長春書屋

無子家人有勸其改適者二氏誓不從遂脫簪珥相與
守節生平相親猶姊妹時中丞次子婦楊孺人亦年未
三十而寡有二子於是合志撫孤中丞撫黔時失察屬
員虧空罰令賠償銀兩本籍僅有舊宅一區沒入於官
家益貧賃草房數間存身而已米鹽無所出崔李惟長
齋繡佛絕迹戶庭不入其室則寂若無人入其室恆見
其勤女紅以之給餽粥供佛香燭而所衣單衫布裙補
綻幾遍嘗澣濯至再絕無塵垢歲時非中丞至親莫能
覲其面有時饗飧不繼竟日一餐處之晏如無感感容

人以爲有士君子安貧樂道之風莫不異而敬焉卒年皆七十案續志列女載有崔氏李氏合傳卽剪裁此記字句爲之如出修志之手然牛太僕之記固昭然在人目也愚意崔李合傳主此記大意務在簡明於傳末聲敘邑人牛坤爲之記詳藝文卽將此記列入藝文此等文字闡揚苦節理應載入邑志况列女志如梁貞烈女張烈女傳末皆有周太史人麒爲立傳詳藝文之語邑志本有此例也

劉節烈王氏

敬鄉筆述卷六

十八

長春書屋

節烈王氏津邑武德佐騎尉職銜劉霈卿恩蔭之側室也年十九歲歸劉君劉君家夙豐頻年以經營不利入不逮出轉致虧累悒鬱而歿氏卽仰藥以殉距劉君歿僅半日耳可謂烈矣一時盛傳當詠四詩以彰之詩云感君義氣薄囂塵不愛黃金愛妾身拚卻蛾眉爲君盡芳心肯讓墜樓人背鏡掩泣淚拋梭一病悲君二豎磨續命丹求仙界少斷腸草種世間多總帷淒絕曉風吹正是紅顏畢命時料得驂鸞追跨鶴夜臺從此永相隨不比尋常兒女情愴然大節荷褒旌迦陵有鳥稱同命

了卻今生結再生劉節烈王氏於光緒九年八月二十日殉節年二十五歲已膺旌表矣

章節烈王氏

節烈王氏津邑同知銜國學生章尚友文瀾之側室也年十八歲歸章君章君年近古稀以病歿先二年前余於戚好處得識尚友晤必長談故於王氏殉節譔聯輓之且往弔焉聯云後大夫一日而亡想雲中鶴馭稍停好挈昇仙佻跨鳳先巧節三朝以去正天上鵲橋初駕偕看織女會牽牛蓋章君於光緒十年七月初三日逝世王氏親視含斂卽於次日仰藥以殉也歿年三十九歲已膺旌表矣

辛節烈王氏

節烈王氏津邑運同銜分發山東候補知縣附貢生辛繡圃榮之側室也繡圃年逾花甲光緒十一年十二月廿六日病歿節烈於十二年正月初八日仰藥以殉先是邑中章節烈王氏殉節繡圃舉以告王安人王安人慨以身許至是果踐前言歿年四十一歲已膺旌表矣繡圃爲余表兄余特譔一聯以輓節烈聯云女子能若

是哉恩報主人翁視斂薦亡不僅十年勤侍奉男兒愧弗如也身殉平日約捐生就義定然兩字荷褒旌聞節烈典質釵珥於初八日延僧誦經超薦主人卽於是日夜殉節可謂從容就義矣吾邑三年中據所知殉節者三人皆側室皆王氏亦一奇也謹誌大略俟修志者採擇分爲立傳

李節烈徐氏

節烈徐氏津邑運同銜附貢生李霽林運昌之側室也年十八歲歸李君爲人謙謹端厚有禮法戚黨稱焉霽

敬鄉筆述卷六

二十

長春書屋

林晚年學書專仿趙松雪曾以所臨天冠山淮西碑等帖屬余跋語並以所書楹聯屏幅墨刻見贈余亦以湖穎徽墨暨所刻書籍報之霽林於光緒十八年三月初九日病歿徐氏於四月初十日絕粒以殉余家同霽林本有姻連又兼世好因譔聯語並輓節烈聯云松雪帖閒臨恪守師承遺翰堪同文敏蓄蕙風香正轉謹隨公去清芬好並晏康傳節烈徐氏歿年三十五歲已膺旌表矣謹誌大略以俟修志者採取立傳

門節烈張氏

節烈張氏津邑從九職銜張恩慶之次女也許字隄頭村候選未入流門萬通之第三子世祺光緒十八年張氏年十九歲迎娶過門事翁姑以孝順稱和娣姒以敬謹聞廿二年世祺忽患喘疾綿延三載氏則日汲汲於藥鑪茗盃間寒暑無間每於夜靜籲天願以身代其勤勞憂患者歷三年如一日居常見夫疾不瘳曾露言死願與夫同歸人勸之則曰翁姑尚有子在固無庸予之代盡夫職也膝下無學語兒亦無庸予之兼事父教也再勸之不復辯既亦不再言二十四年二月初三日世

敬鄉筆述卷六

二十一

長春書屋

祺病歿氏親視含斂訖即於次日仰藥以殉卒年二十五歲矢死靡他捐生就義斯可謂之節烈矣士紳擬公稟府尊轉詳督憲附片奏請旌表稟稿曾經余脩飾因悉其詳謹掇大要錄存以俟修志者采取立傳

案津邑節烈殉夫者自光緒十二年辛節烈王氏後聞尚有十餘起自十八年李節烈徐氏後又有十餘起且多出於窮檐委巷尤不易得曾詢陳挹爽明府知經報局彙詳請旌其姓氏俱

載入冊籍矣